

1668

LES

37

TERREURS

PANIQVES DE CEVX

qui pensent que l'alliance d'Es-
pagne doive mettre la guerre
en France.


39

M. DC. XV.

THE NEWBERRY
LIBRARY

A V LECTEUR.

161522 **V**OYANT courir des Libelles qui n'ont pour fondement que la mesdisance, ny pour but que la sedition, Qui par des paroles escrites avec peu de ingement, & moins de raison, tuschent d'irriter le peuple: & tantost en le flatant de l'esperance de le soulager, & du desir de venger la mort du feu Roy (choses toutes esloignées, & contraires à la pensèe de ceux qui le disent,) & tantost en l'espouventant des menaces, & des forces d'un party qui ne peut subsister qu'en la confusion, le veulent desbaucher de l'obeyssance qu'il doit au Roy. Je me suis essayé de desabuser les moins clair-voyans, & par des raisons, & par des exemples irreprochables, refuter des simples paroles qui ne contiennent ny l'un, ny l'autre. Si le discours en est libre, il est encore plus veritable, Mais qui parmy ceste liberté, n'offense point le respect que l'on doit aux grands, ny ne procede d'autre passion, que de celle que j'ay de servir mon pays, & mon Roy. ADieu.



*Les Terreurs Paniques de ceux qui pensent
que l'alliance d'Espagne doive mettre
la guerre en France.*

Estant demeuré dans Paris depuis que le Roy en est party pour aller en ce voyage qui a donné l'alarme à tant de personnes, lesquelles s'effroyent de leur ombre; Et oyant parler si diuersement de son Mariage, ie ne me puis tenir d'en dire ma ratelee comme les autres, bien qu'avec plus de raison que la pluspart de ceux qui en babillent. Mais d'autant qu'on a desia discouru sur le bien, ou le mal qui pouoit venir de cette Alliance, & que s'y vouloir arrester dauantage, seroit redire les mesmes choses. Je parleray seulement de ceux qui taschent d'espouuanter les sujets du Roy, des mouuemens de Monsieur le Prince, ou de ceux qu'on appelle de la Religion pretendue reformee.

Ceux-là disent que Monsieur le Prince

a ie ne ſçay combien de mille hommes, avec leſquels il eſt reſolu de rompre le coup de ce Mariage, & eſloigner du Cōſeil de ſa Majelté les perſonnes qu'il luy a nōmees, avec tout plein d'autres choſes exprimees plus au long en ſon Maniſeſte: & que les deputez de ceux de la Religion ayant fait des demandes conformes aux ſiennes, & redoutant cette Alliance ſur toutes choſes, le ſeruiront contre le Roy meſme, & mettront l'Eſtat en peril.

Pour moy, ie ne penſe pas que les vns ny les autres en ayent enuiè; mais ie croy qu'ils en ont encore moins de moyen: Et d'autant qu'en ces choſes-là l'on ſe paye pluſtoſt des exemples que des raiſons, & que nous en auons chez nous des plus illuſtres qui ſoient au monde; Nous propoſerons deux factions les plus grandes, & les plus fortes qui ſe ſoiēt iamais veües dans vn Eſtat, la derniere deſquelles ſ'eſt diſſipee en fort peu de temps, avec de petites forces; & l'autre ayant eſté reduite à

l'extremité, ne s'est^s depuis restauree que par les mesmes moyens par lesquels on l'a voulu perdre.

Ie parle de ceux de la Religion, & de ceux de la Ligue; Ausquels pour estre les derniers, & les exemples plus fraiz, nous nous arresterons dauantage. Elle eust premierement la Religion pour pretexte, qui est la plus violéte passion des ames, & qui porte plus furieusement les hōmes aux armes. Et quant à ses partisans, elle eust son pere en Espagne Philippe secōd, l'vn des plus grands Rois que ce royaume ait iamais eu. Son parrain en Italie qui estoit le Pape, de la puissance & autorité duquel personne ne doubte: Et son chef ministeriel en France le feu Duc de Guise, l'vn des plus braues Princes, non seulement de sa maison qui en a porté de tres-excellens, mais de toute l'Europe; lequel reduisit Henry troisieme à la iurer, contre qui elle auoit esté iuree. Il estoit assisté de tout le Clergé, & d'une bonne partie

de la Noblesse de France, de tout le peuple, & de tous les Parlemés, il ne s'en falloit que Bordeaux; qui fut retenu en son deuoir par la prudence & fidelité du Marechal de Matignon, lequel en raporte encore dans le tombeau vne louange & reputatioin immortelle.

Outre cela il auoit vn auantage que Prince auourd'hy viuant ne peut iamais esperer; c'est qu'il auoit a faire à vn Roy qu'il auoit sceu rendre tellement odieux à tous ses sujett, qu'il n'eust point de peine à les faire rebeller contre luy. Là où celuy que DIEV nous a maintenant donné, en est autant aimé comme l'autre en estoit hay; Et certainement à bon droit, car iamais Prince ne donna de plus grandes esperances de sa bonté qui est l'objet de l'amour. D'ailleurs la memoire glorieuse du Grand Henry luy sert de beaucoup; car tout le monde se ressouuiet qu'il sauua l'Estat, que les autres auoient bien fort hazardé, & chacun cōserue en-

core au fils l'amour, & l'obligation qu'il deuoit au pere. Ioint que l'experience des troubles passez, & les playes encore fraisches & sanglantes des dernieres rebelliōs nous retiennēt en nostre deuoir, & nous font sagement discerner le sujet d'avec le pretexte de ceux qui remuent; Tellemēt qu'aucun ne peut maintenant rien auoir de ce qu'auoit alors le feu Duc de Guise.

Auecque tout cela, ce pauvre Prince y perdit la vie, & Monsieur du Maine qui luy succeda peu de temps apres sa creance avec celle de tout sō party. Et croit-on que sās le coup du Ciel, ou plustost d'enfer de Iacques Clement, il y eust bien perdu dauantage. Ce Prince qui neātmoins estoit grand, & qui est mort en la reputation de grand Capitaine, & grand hōme de bien (deux choses qui ne vont pas tousiours ensemble;) Apres tant de breuages de rebelliō qu'il auoit goustez par vne passion plus naturelle que raisonna- ble, en fut tellement degousté, que fai-

fant apeller Monsieur du Maine son fils vn peu deuant son trespas pour receuoir sa derniere benediction, Entre plusieurs graues discours qu'il luy fit de l'obeyssance, seruice & fidelité que les sujets doiuent à leur Souuerain, il luy dit, Qu'au lieu de sa benediction, il luy donnoit sa malediction, si pour quelque occasion, ou pretexte que ce fut, il embrassoit iamais autre party que celuy du Roy, parole espouuëtable que ce Prince ne doit iamais oublier, & que i'ay bien voulu mettre icy à l'honneur de la memoire de celuy qui l'a ditte; d'autant qu'elle a esté representee depuis peu de temps à Monsieur du Maine, par vn Euesque qui auoit esté present alors qu'elle luy fut proferee.

Voyons maintenāt si le party de Monsieur le Prince est fortifié de toutes ces choses. Premieremēt le pretexte n'a rien de commun avec la Religion; Celuy de l'Estat est foible, & puis descouuert dès l'Esté passé; où le peuple qui a veu ses armes

mes se ressouuiët encore de quelle façon il l'a soulagé, & ne croira iamais que la guerre soit vne medecine propre à son mal, ny que des soldats qui emportoient iusques à la paille du liët, le doiuent mettre à son aise, tellement qu'il ne reste plus à vuider que le mariage du Roy, & la iustice des personnes qu'ó luy a nommees.

Or pour le mariage, le pretexte en pouuoit auoir quelque lustre du temps que le Roy estoit encor Mineur, & de fait ceux qui en parloient en ce temps-là ne disoient sinon qu'il falloit attendre qu'il fust Majeur. Mais à present, Quelle insolence est-ce à ses subiects, de le vouloir assubiectir luy-mesme à ne se marier point, ou bien à se marier à leur fantasie? Ouy, mais voicy là terreur panique; Le Roy d'Espagne, disent-ils, qui environne la France de tous costez, la viendra lors engloutir. A cela il y a tant de choses à respondre, qu'on est plus empesché de choisir les raisons, que de les chercher.

Mais premierement, si le Roy d'Espa-
 gne nous deuore ainsi que Saturne fai-
 soit ses enfans, ie demanderois à ces gens-
 là qui sont en si grand soucy de l'Estat.
 Qui perdrait en cela dauantage, ou eux
 qui ne pourroient au pis aller que chan-
 ger de maistre, ou sa Majesté qui ne pour-
 roit perdre l'Estat qu'avec sa vie? car les
 Royaumes ne se perdent pas à moins.
 Que si l'on void euidemment que la per-
 te que feroit le Roy, seroit incompara-
 blement plus grande que celle de tous
 ses sujets; pourquoy ne le laissons-nous
 preuoir & preuenir ces inconueniens a-
 uec son conseil, & non pas faire les enten-
 dus, & les interessez en vne chose ou son
 interest est si grand par dessus le nostre?
 N'est-il pas Roy afin de nous conseruer,
 & nous commander? Et ne sommes nous
 pas ses sujets afin de luy obeir, & de le ser-
 uir sans entrer en cognoissance de ce qu'il
 commande? Voudrions nous rendre sa
 condition pire que celle d'un chef d'Ar-

mee, qui fera faire cent mouuemens à ses foldats, desquels ils ne sçauront nullement la cause? Voila pour preuenir toute dispute, & monstrier que sa Majesté n'est sujete de rendre conte de ses actions qu'à Dieu seul, & moins à ses subjets qu'à tous autres.

Mais pour faire voir que c'est vne terreur panique, Quelle raison y a t'il que le Roy d'Espagne nous puisse nuire par le moyen de ceste Alliance? Est-ce parce qu'il prend Madame, ou parce qu'il donne son Infante? Si pour Madame le procez en est desia vuidé il y a long temps, & principalement aux despens de l'Angleterre, qui fait voir à tout le monde que les filles ne succedent point en France, S'il la vouloit, ou la pouuoit empieter, ce ne seroit iamais deffous ce pretexte: Et quoy? n'y a t'il pas eu d'autres filles de France mariées en Espagne? L'Archiduchesse qui est encores en Flandres, n'en est-elle pas descenduë? pourquoy est-ce

qu'il pretendroit dauantage de ce mariage icy, que des autres? Cela n'a couleur, ny apparence quelconque, Quand le Roy d'Espagne nous voudra quereller, il ne faudra iamais à trouuer des pre-textes plus especieux.

Et si c'est parce qu'il donne son Infante, Quelle raison y a t'il de croire qu'un enfant, auquel on a desia fait son train & sa Maison de François auant qu'elle soit en France, y puisse apporter quelque prejudice? Est-ce la premiere que nous auons eüe d'Espagne? La mere de saint Louys qui regit si heureusement le Royaume durant les voyages que ce braue Roy fit en Asie, & en Afrique, & à la Regence de laquelle toute la France en pleins Estats, & deuant eux le Parlement a comparé iustement celle de la Reyne, n'estoit-elle pas Espagnolle? La femme du Roy François premier, n'estoit-elle pas sœur de l'Empereur Charles le Quint Roy d'Espagne? Auons nous plus de su-

jet de craindre ceste Alliance icy, que celle-là? Ce Roy là, estoit-il moindre, ou plus amy de la France que cestuy-cy? Y eust-il iamais ennemy qui eust tant d'enuie de la deuorer, ny qui fit tant d'efforts pour y paruenir? Et neantmoins il ne se trouue point que les François de ce temps-là fussent si craintifs, d'entrer en ombrage de ceste Alliance? Certainement c'est trop faire d'honneur aux Espagnols, de leur monstrier que nous les redoutons quand ils nous recherchent, nous, qui ne les auôs iamais craints les armes en main, c'est les conuier à ce qu'ils n'osent pas entreprendre, & donner le courage de nous attaquer, à ceux qui n'aguere pensoient que ce leur estoit beaucoup de gloire de nous attendre.

Mais, ce qui est le plus important, comme la crainte ne fait le plus souuent qu'auâcer le mal, c'est leur faciliter les moyës d'aspirer à ce qu'ils desirent. Car leuant les armes sous pretexte de ceste crainte,

& allumant la guerre ciuile en France, qui ne sçait que c'est la diuiser en parties & factions contraires, & par conséquent l'affoiblir, & luy oster le moyen de se defendre contre l'Estranger? Et qui ne sçait que le Roy d'Espagne ayant assisté l'un des partis, & affoibly l'autre, se pourroit mieux emparer de la France, diuisée apres les ruines d'une longue guerre, que non pas maintenāt qu'elle est vnue & florissante, par vne Alliance? Ce sont donc ceux qui redoutent, ou qui font semblant de craindre ce Mariage, qui veulent exposer la France à la seruitude de l'Espagnol, & non pas ceux qui l'ont contracté. Mais c'est assez pour le Mariage.

Quant à la Iustice qu'on requiert à sa Majesté, ie ne veux pas faire icy l'Adoucat, ny pour les vns, ny pour les autres, & encore moins le Conseiller d'Estat. Mais d'autant qu'il importe principalement au Roy, c'est à luy d'en cognoistre, & d'en iuger. Bien diray-ie, en passant que

ie n'ay iamais veu de procedure, ny de formes pareilles à celle-cy; Au contraire en la plus part des crimes qui viennent en Iustice, les accusateurs sont tousiours presens, & les accusez quelques fois absens, & icy tout au rebours. Mais tant y a que ce sont des particuliers pour lesquels on ne doit point troubler vn si grand Estat; aussi n'y a t'il pas guere d'apparence que beaucoup de gens s'y fassent rompre la teste.

Voila en effect tous les pretextes qu'ils peuuent auoir, car de Religion il ne s'en parle point, Dieu mercy; le party est formé dans l'Estat, & tous les François sont d'accord, qu'il vaut mieux l'y toller avec incommodité, que l'en arracher avec peril. Il reste maintenant à voir la creance que Monsieur le Prince y peut auoir, & les moyens de soustenir ses pretextes.

Quant à la creance, elle est bien esloignée de celle que ses predecesseurs y ont

euë, car ils faisoient prendre les armes en vne nuit à tout le party par toute la France, sur vn simple aduis, & sans aucune Assemblée, ny deliberation de conseil, Ce que toutes les raisons du monde seroient maintenant bien courtes à leur pouuoir persuader. Et outre la créace qu'ils auoient dans le Royaume, ils l'auoient encore si grande parmy les Estrangers interessez en leur cause, qu'ils y leuoient des armées à credit qui ne leur coustoient quasi rien: & ce qui est encore plus admirable, les soldats François leur donnoient de l'argent au lieu d'en prendre, pour payer les Estrangers, ce que ie n'ay iamais leu de ceux de Cesar, ny d'autre Capitaine qui fut iamais. Or si cela se doit esperer de ceux qui seruiron Monsieur le Prince, i'en demande à ceux qui le suiuirent l'esté passé. Ce n'est pas qu'il ne soit aussi grand & puissant Prince comme ses predecesseurs, mais c'est que la cause n'est pas semblable. Et puis, il n'est pas de mes-

me

me Religion, ayant esté instruit en meilleure eschole, & si bien versé en la cōtrouerse, que ie l'ay veu confondre des plus habilles en la doctrine de ceste secte, & plusieurs luy ont ouy dire, qu'il se feroit aussi tost Iuif, ou Mahometan qu'Huguenot. Quelle apparence donc qu'ils s'engagent au party d'un Prince, qui est d'une Religion si contraire à celle qu'ils croient? Et quand ils s'y engageroient, qu'en pourroit-il esperer que les mesmes euenemens qui succederent à ses Ancestres? Croiroit-il mieux faire avec tant de manquemens parmy eux, que ne firent les autres avec tant d'avantages? Ouy; mais ils sont à ceste heure plus forts qu'ils n'estoient alors; Au contraire il n'y auoit alors fils de bonne mere, qui ne fust des leurs, & le zele de leur Religion les portoit à faire des choses que ceux-cy n'oseroient maintenant penser, tesmoin la coniuration d'Amboise, & de Meaux.

Et pour le monstrer encore plus clai

rement, voyons s'il se trouueroit quel-
qu'un parmy eux, qui s'osast promettre
de faire signer vne requeste à cinquante
mille hommes de ce party, comme l'Ad-
miral de Chastillon promit au temps du
Roy Charles?

Mais Monsieur le Prince est assisté
d'autres grands Princes qui mettront de
grandes forces ensemble. Ouy, Monsieur
le Prince a-t'il le Pape qui luy enuoye icy
des Legats, & des foudres d'Anatheme
contre le Roy, comme auoit la Ligue?
A-t'il le Roy d'Espagne qui fasse couler
icy des ruisseaux d'or par tout le Royau-
me? A-t'il les tailles du Roy que prenoit
la Ligue avec toutes les forces, & reue-
nus de la France? A-t'il la creance ny la
bien-vueillance qu'auoit le feu Duc de
Guyse parmy le peuple, ny les moyens de
luy rendre le Roy si odieux comme il
auoit sceu rendre Henry troisieme? A-t'il
en fin le Clergé, les Villes, les Parlements,
& la plus grande partie de la Noblesse?

Que s'il ne l'a point, comment voulez-vous qu'il fasse avec rien de tout cela, ce que la Ligue ne peut faire avec tant de choses? Mais ce n'est pas aussi son dessein, il a trop d'intérêt au bien de cest Estat pour en desirer la dissipation, comme il ne faut pas croire aussi qu'aucun des Princes qui sont avec luy, le voulussent assister en vne si mauuaise cause.

Le dessein de Monsieur le Prince n'estant donc que de rompre le mariage du Roy, ou du moins empescher qu'on ne le precipite, ainsi qu'il dit, & de faire punir ceux qu'il a nommez à sa Majesté. Il en arriuera l'vne de deux choses, ou que ne l'ayant peu par amour, il l'entreprendra de force, ou qu'il ne l'entreprendra pas. S'il ne l'entreprend, on dira qu'il a tort d'auoir refusé d'accompagner le Roy, pour demeurer icy les bras croisez; & s'il l'entreprend, on dira qu'il en a encore dauantage de l'entreprendre. Et de ces deux choses, s'ensuiura encore l'vne

de ces deux, c'est qu'il viendra à bout de son dessein, ou qu'il n'y viendra pas, comme il est le plus assuré. S'il n'y vient pas, il aura toujours offensé le Roy, & troublé l'Etat pour neant, deux choses de périlleuse consequence; & s'il y vient, c'est le pis qui luy puisse arriuer. Car ayant violenté le Roy en vne chose si libre que le mariage, il faudra en fin qu'il pose les armes, quand bien elles seroient victorieuses, & que cessant la cause cesse l'effet; & cependant le ressentiment que sa Majesté aura contre luy sera d'autant plus vif, que l'offense se trouuera grande.

Je dis au pis aller, car il n'y a aucune apparence que cela puisse estre, mais quand il seroit, le Roy en seroit toujours quitte pour dire qu'il ne se veut pas marier, puis que ses subiects ne le trouuent bon, & n'en arriueroit autre chose. Mais ie ne sçay pas si ses subiects en seroient quittes pour dire qu'ils n'auoient en cela pensé qu'au seruice de sa Majesté, car tous

ceux qui prennent les armes contre leurs Roys en disent autant. Ceux de la Ligue disoient au commencement que c'estoit pour rendre au Roy Henry troisieme son autorité, de laquelle ils le vouloient despoüiller; Et autant en disoient les Huguenots de François second, & de Charles neuvieme avec plus de pretexte que Monsieur le Prince; mais il ne se faut pas amuser à chercher des preuues d'une chose si manifeste.

Toutesfois on repliche icy deux choses, qui ont esté desia dites, pour monstrier les moyens que peut auoir Monsieur le Prince de trauerser le voyage du Roy (mot qui fait mal à l'ouyr, & à l'escrire, qu'un Roy de France soit trauersé par un sien subiet en un voyage qu'il fait dedans son Royaume.) L'une qu'il est assisté de plusieurs Princes, qui ne sont en tout que Monsieur de Longueuille, & Monsieur du Maine, L'autre que le party de la Religion branlera pour luy.

Nous auons desia preuenu ceste objection, Toutesfois pour le contentement des plus curieux disons-en encore vn mot.

Quant aux Princes qui l'assistent, ils sont grands & puissants pour toutes les autres choses qu'on voudra, pourueu que ce ne soit pour faire la guerre au Roy, car en ce fait là ils ne font rien à comparaison de ceux qui l'ont autrefois entrepris à leurs despens: & ne pense pas que tous ensemble puissent deffrayer trois mois vne armee pour petite qu'elle soit, là où sa Majesté en soustiendra dix. Et de dire que la guerre se nourrit d'elle-mesme, ce n'est pas le moyen de subsister, ny de la faire quarante huiet ans en France, comme les Holandois au pays bas. Où il faut qu'ils permettent toutes sortes de violences aux soldats en ne les payant pas, & par ainsi qu'ils ruinent le pays, ou qu'en les payant, ils se ruinent eux-mesmes. Or ruiner le pays, & se ruiner eux-mesmes, est vne mesme chose, car ils se

ruineront avec le pretexte qu'ils ont de
 le soulager. Hé! comment fera-l'on ac-
 croire qu'on veut soulager la France,
 qu'on verra fumer sous les ruines de tant
 de flammes qu'ils y auront allumées?
 Ioinct qu'il n'y a rien qui se ruine plustost
 de soi-mesme qu'une armée indiscipli-
 née; Que s'ils la veulent discipliner, il la
 faut paier necessairement. Et d'où pris
 (demandoit la feu Royne Marguerite,
 l'esté passé, vn iour qu'on luy disoit, que
 les mesmes Princes auoient ie ne sçay
 combien de gens:) d'où prendront-ils
 l'argent pour les soldoyer? car la guerre
 ne se fait plus à credit, les soldats ne se
 couronnent plus d'herbe, ny ne refusent
 plus les chaisnes d'or comme les premiers
 Romains. Monsieur le Prince de Condé
 Ayeul de cestui-cy, la fit quelque temps
 ainsi que nous auons dit; mais c'estoit en
 vne saison où le zele de la Religion estoit
 si ardent, qu'il faisoit donner de l'argent
 à ceux qui en demandent aujourdhuy.

Et si avec tout cela, apres auoir disposé des moyens de tout son party, tant luy que son fils, qui ne luy cedent en rien, & obtenu des paix aduantageuses les armes en main, ils sont morts toutesfois bien pauvres, & ont laissé Monsieur le Prince, ainsi que tout le monde sçait, le plus incommode Prince de la Chrestienté. Et quant à feu Monsieur du Maine, qui iouyt si long temps des forces & des moyens de tout le Royaume outre ce qu'il tira d'Espagne, chacun void ce qui luy en est demeuré. Que peut-on donc esperer de leurs enfans, s'ils s'engagent si gayement en vne guerre contre le Roy, n'estans appuyez que de leurs fortunes particulieres? Car nous auons desia monstré que le fer d'Allemagne brâloit pour ceux de la Religion, l'or d'Espagne couloit pour ceux de la Ligue, & le plomb d'Italie ne faisoit gueres moins d'effect que les autres deux: & neantmoins tout cela ayant esté court, quelle apparence y peut-il

peut-il auoir en la durée d'vn party, qui n'a rien de tout cela?

De penser que les mesmes Allemans, & les Anglois les fauoriseront, cela est fort incertain. Mais il est tres-certain, que le Roy d'Espagne, le Pape, les Venitiens, & tous les Alliez de sa Majesté l'assisteront fort fidelement, & de cela personne n'en doute. Mais chacun doute à bon droit des autres, des Allemans, parce qu'ils ne sont point interessez en ceste cause, comme ils estoient du temps qu'on brusloit icy leurs confreres, & par ainsi n'ont à faire de s'en mesler. Du Roy d'Angleterre, encore moins, parce qu'il est allié de sa Majesté, & d'ailleurs c'est vn Prince sage, & qui n'ayme pas moins la paix, qu'il hait mortellement les broüilleries dans vn Estat; ioint que fauoriser vne reuolte chez ses voisins, ce seroit vn mauuais exemple en ses subiets propres; le Roy d'Angleterre est trop grand politique, & n'ayme pas si particulierement Mon-

seigneur le Prince, qu'il vueille perdre l'amitié du Roy pour la sienne. Et quant aux Hollandois qu'on met encore en ligne de conte; il y a bien du discours & de la raison à croire qu'un Estat encore naissant, qui ne s'est formé, & ne subsiste encore aujourdhuy que par la faueur, & les moyens de la France, luy donne maintenant quelque sujet de se joindre avecque l'Espagne pour le destruire. Ce sont donc des Terreurs paniques que de nous vouloir espouuenter de cela.

Quant à ceux de la Religion, outre qu'ils ne sont pas en estat non plus que les autres, de nous faire plus de peur ny de mal, que d'en receuoir, ils perdroient le sujet & le pretexte qu'ils ont tousiours pris de leuer les armes, qui estoit la liberté de conscience en laquelle ils estoient forcez. Et s'ils ont esté battus par tout en un sujet plein d'apparence, il est fort apparent qu'ils seront ruinez tout a fait, quand ils n'en auront du tout point, comme ils

n'en peuuent iustement prendre. Car outre qu'ils ne sont nullement pressez en la liberté de leur conscience, ny priuez de l'exercice de leur Religion, ny des charges de ce Royaume comme ils estoient, mais iouissent des mesmes honneurs que les Catholiques, & ont l'entrée du cabinet comme avec les plus fauoris; ils ont encore dauantage vn fonds particulier de pension destinée seulement pour eux, & ont basty leurs fortunes parmy nous dans les meilleures villes de France, qu'il faudroit quitter; Ce que ie ne croy pas qu'ils voulussent faire, pour aller tenir la campagne en Picardie, ou prendre vn meschant village en Gascogne avecque Monsieur le Prince. Je ne dy pas que quelques morfondus & desesperez de leur party, aussi biẽ que des Catholiques, ne le suiussent, à la charge de le quitter à la premiere commodité que l'occasion leur presenteroit, mais que tout le corps de la Religion s'embarque avec luy, c'est

vne Terreur panique.

Et de fait n'en auroit-on pas veu desia quelque esclat? Il me semble qu'il est plus facile d'empescher vn Mariage auant qu'il se fasse, que de le rompre apres qu'il est fait. Le Roy est desia à Bourdeaux, ses subjets luy osteront-ils sa femme par le chemin? Cecy me fait souuenir des entreprises des Cheualiers de l'Isle ferme, qui osterent Oriane aux Romains, si ce n'est que ceux là auoient pour pretexte le secours d'une Princesse qu'on marioit, & desheritoit par force, avec lequel encore ne l'osterent-ils qu'aux Ambassadeurs, & ceux-cy n'en ayant aucun, la voudroient oster au Roy mesme. Mais ie ne croy pas qu'il s'en puisse trouuer en Gaule, ny en toute la grand Bretagne qui soient si temeraires seulement de l'imaginer. Leurs Majestez y ont mis aussi tel ordre, que de quelque costé qu'on remuë, on se trouuera pris par tout. Car outre qu'elles ont de quoy se faire iour, & dissiper aussi bien

les nuages qui se voudroient opposer à la clarté de leurs rayons , comme elles les dissipèrent l'esté passé par leur seule veuë: Elles ont laissé deux armées, la moindre desquelles est assez forte pour les faire recognoistre, l'une dans le Royaume sous le Marechal de Boisdaufin, & l'autre à la frontiere sous le Marquis de Spinola, Qui ne sont pas composées de soldats de quinze à la douzaine comme ceux du party contraire, mais bien disciplinez, & payez, & qui soustenant vne iuste cause, ie laisse à penser ce qu'ils doiuent faire contre des soldats tels que ceux que nous auons dechiffrez.

Que si leur malheur attire les armes de sa Majesté sur leurs testes, & qu'ils le contraignent de monter à cheual en personne pour leur fondre sur les bras; Que feront vn tas de gens ramassez de toutes sortes, contre vne si genereuse Noblesse que celle de France, combattant aupres de son Roy? ou pour mieux dire, qu'euf-

30

sent-ils desia fait, si la bonté ne les eust espargnez iusques à present ? Car chacun sçait qu'ils ne subsistent que par la patience, & que s'il ne preferoit la douceur à la violence, ils seroient desia perdus. Mais la Majesté veut imiter le Soleil, & non pas le vent. Ne sçavez-vous pas qu'ils firent vne fois gageure qui despoüilleroit plustost vn homme ? & que le vent le pouffant rudement, luy faisoit d'autant plus garder sa robbe qu'il s'efforçoit de la luy oster ; là où le Soleil le pressant doucement par la chaleur de ses rais, la luy fist quitter de luy-mesme.

Il y a encore vne autre chose entre mille que nous obmettons ; c'est que quand le Roy auroit perdu dix batailles, il se remettra tousiours en moins de rien sur ses pieds ; Là où ses ennemis n'ont point de ressource, & ne se pourront iamais non seulement releuer quand ils seront abatus ; mais encòre ne se pourront iamais garder de tomber d'eux-mesmes.

Pour preuue de cela, il ne faut que se représenter la Ligue, laquelle toute grande, toute puissante, & toute espouuentable comme nous l'auons veüe, n'eust pas laissé de se ruiner d'elle mesme, quand mesme le feu Roy n'eust point hasté sa ruine, parce que chacun y auoit son dessein à part, & que bien qu'ils fussent tous d'accord d'empescher qu'il ne succedast à la couronne, ils ne l'estoient pas de celuy qu'ils deuoient mettre en sa place.

Et puis, quels grands Capitaines pour entreprendre la guerre contre vn Roy de France? Ie ne veux pas dire que Monsieur le Prince, Monsieur de Longueuille, & Monsieur du Maine, ne soient vail-lants de leurs personnes pour combattre en particulier. Mais pour commander en generaux d'armees, chacun sçait que leur aage, ny le temps auquel ils sont venus, ne leur permet pas d'auoir les parties d'vn chef de guerre. Monsieur de Neuers en sçait tout seul plus que tant qu'ils

sont, mais ils l'ont perdu aussi bien que Monsieur de Vendosme, qui estoient les deux plus belles plumes de leur aïlle. Le Marechal de Bouillon leur reste encore qui est assez bon Capitaine, mais heureux comme chacun sçait, & qui est plus pres de se voir enclos dedans le pourpris de sa petite principauté non sienne, que d'en sortir pour mettre le feu dedans ce Royaume. Comparez maintenant ceste puissance à celle du Roy, & vous verrez que la peur qu'on nous en veut faire, est vne Terreur panique.

Et ie ne sçay pas comment les François, qui ont veu plusieurs fois les Roys d'Espagne & d'Angleterre, liguez avec l'Empereur & le Pape, contre la France, sont maintenant deuenus susceptibles de ces impressions. Vous diriez que la moindre fueille qui branle, tout est perdu, & où est doncques la race de ces genereux Gaulois qui ne craignoient rien, sinon que le Ciel tumbast sur leurs testes? Il est
vray.

vray, c'est vne destinée à nos ieunes Roys de ne passer iamais leur premiere ieunesse sans quelque trouble, mais le repentir n'a pas esté moins fatal à tous ceux qui les ont troublez : & iamais homme n'a voulu ruiner cest Estat, qui ne s'y soit ruiné luy-mesme. Qu'on en voye l'Histoire, on trouuera que ce que ie dis est veritable.

Non pas que ie croye que Monsieur le Prince, ny pas vn de ceux qui l'assistent ait ce dessein, la à Dieu ne plaise. Mais vn abyfme appelle l'autre, l'on s'engage sans y penser au commencement à des choses que la necessité nous contraint puis apres de faire. Le Conte Iulian qui mit les Morres en Espagne, ne pensoit qu'à venger son iniure particuliere, & perdit toute sa patrie. Feu Monsieur le Prince de Condé, & l'Admiral Chastillon, n'espouserent le party de la Religion que pour s'en seruir contre ceux de Guise, & depuis ils se trouuerent insensiblement obligez à

s'en seruir contre le Roy mesme; Les exemples n'en sont que trop familiares & domestiques à nostre grand malheur.

Voila doncques le sujet des Armes de monsieur le Prince, car de dire que c'est pour sa iuste defense, personne ne l'attaque, ny ne le poursuit, on le laisse aller & venir comme bon luy semble, On l'empesche bien d'entreprendre, mais on n'entreprend rien sur luy. Et quand au reste des sujets exprimez en son manifeste, ausquels la responce qu'on y a desia faite, m'empesche de m'arrester, il en y a deux admirables que ie ne puis passer sous silence, l'un, quand il se plaint qu'on hazarde la santé du Roy par ce mariage, l'autre qu'on l'a pressé d'estaindre le droict annuel. Sans doute ce dernier n'est point de monsieur le Prince, il est de quelqu'un qui a payé la Paulette, lequel ayant mieux son interest particulier, que le bien public, s'est laissé transporter à sa passion. Mais est-il possible qu'il se trouue encore

des gens qui tournent à crime la plus iuste supplication, qui se soit iamais faicte en tous les Estats de France? & qu'on s'ose plaindre publiquement, que les gens de bien ayent demandé que les offices soient donnez à la vertu, non point à l'argent? Que monsieur le Prince ayant signé ce manifeste, s'offense qu'on a voulu oster la Venalité de la France, qui est vn de ses plus grands maux, & dont l'abolition eust esté le plus grand bien qui pouuoit reussir de la conuocation des Estats? Est-il possible encore vne fois, qu'il se plaigne de ce qu'on hazarde la vie du Roy en le mariant si ieune, & qu'en mesme temps il se plaigne aussi de ce qu'on veut oster la Venalité des charges, qui expose son Estat, & sa vie à tant de dangers? Est-il possible qu'un homme qui s'arme pour rendre l'honneur à la vertu, & l'integrité à la Iustice, s'offense qu'on ait osé demander apres les Estats qu'elles ne fussent point vendues? Et

pleust à Dieu que la faueur de ceux qui
 l'ont requis, eust esté plus grande encore
 qu'elle n'est, & que leur demande leur
 eust esté accordée ! A la verité l'on leur
 fait beaucoup d'honneur de se plaindre
 de cela. Mais ayant traicté ce sujet ail-
 leurs, ie ne m'y veux pas estendre dauan-
 tage, si ce n'est pour preuenir vne diffe-
 rence qu'on me pourroit faire de la Ve-
 nalité avec le droict annuel, qui toutes-
 fois est nulle; car tant que le droit Annuel
 demeurera, on ne peut oster la Venalité,
 Allez croire maintenant que ces gens-là
 se soucient de la santé ny de la vie du Roy,
 qui crient qu'on la hazarde en le mariant
 si tost, & se plaignent d'un autre costé,
 quand on veut empescher que par la
 vente des charges, on ne fasse entrer tou-
 tes sortes de gens dans son Conseil, en sa
 table, en son cabinet? où est-ce, ie vous
 prie, que sa vie est plus hazardée, ou en
 le mariant avec vne Princesse de son âge,
 & encore plus ieune, ou en l'exposant

par la venalité des offices à toute sorte de traistres, empoisonneurs, & meurtriers qui peuuent entrer dedans sa maison? Et neantmoins on fait vn grief de ce qu'on leur a voulu fermer la porte en estaignāt le droit Annuel, avec la venalité des charges.

Ques'il se void par là qu'ils n'ont rien moins en la pensée que le soucy de conseruer la vie du Roy, quelque parade qu'ils en fassent pour faire les bons valets; ils se soucient encore moins de poursuivre la mort du feu Roy. Tout cela ne sont qu'artifices & fusils de sedition, pour faire presumer au peuple que la Royne ne s'en est pas bien acquitée. Et neantmoins, quels Iuges plus entiers & plus naturels y pouuoit-elle employer que le Parlement? Osera-l'on dire qu'une telle compagnie qui s'est tousiours monstrée si jalouse de la vie de son Prince, aye negligé la Iustice de sa mort? Mais qui ne void la foiblesse de ce pretexte, & que

Monſieur le Prince ayant teſmoigné par tant d'actions qu'il ne regarde qu'à ſes affaires, ne ſe ſoucie de la mort du Roy que pour allarmer le peuple, qui a le principal intereſt en ſa perte? Car les grands n'en ont pas empiré leur condition, & Monſieur le Prince moins que tous, qui eſtant réduit à Milan au train d'un ſeul Eſcuyer, & n'eſtant remôté depuis en ſa grandeur que par la liberalité de la Roÿne, n'a pas tant de ſubjet de s'ẽ plaindre, qu'elle : mais tel demande raiſon de ſa mort, qui ſeroit bien marry de le voir en vie.

Qu'on pardonne à la iuſte douleur que ceſte playe me renouvelle, ſi elle me contraint de parler ainſi. Je ne ſuis inſpiré d'aucune paſſion contre perſonne, & moins contre monſieur le Prince que tout autre, duquel hors l'interreſt du ſervice du Roy, ie ſuis tres-humble & tres-obeyſſant ſerviteur, comme ie luy ay teſmoigné il y a plus de dix ans. Et deſire,

rois avec les gens de bien de le reuoit
tant luy que monsieur de Longueuille,
& du maine aupres de sa Majesté, comme
ils en ont esté conuiez. mais principale-
ment monsieur le Prince, qui deuroit en
ceste occasion y tenir le rang qui est deu
à la grandeur de sa Naissance, ainsi qu'el-
le luy a commandé, plustost qu'en luy
desobeyssant se faire remarquer à la po-
sterité, pour auoir esté l'Autheur de tant
de calamitez qui accompagnent les
guerres ciuiles, & l'argument & sujet
principal de ceste Terreur panique.

F I N.

